



ԱՌԱՋՆՈՐԴԱՐԱՆ ՀԱՅՈՑ
ՀԻՄՆԻՍԱՅԻՆ ԱՍԵՐԻԿԱՅԻ ԱՐԵՄՍՏԵԱՆ ԹԵՄԻ
WESTERN PRELACY
OF THE ARMENIAN APOSTOLIC CHURCH OF AMERICA
 Archbishop Moushegh Mardirossian, Prelate
 Tel: 818-248-7737/8, Fax: 818-248-7745, E-mail: Prelacy@aol.com



Հանրապետական Մաղթանք Արեւմտեան Թեմի Եկեղեցիներուն Մէջ

ՏԵՐ, ԱՆՍԱՍԱՆ ՊԱՅԷ ՎԵՐԱԿԱՆԳՆԱԾ ՀԱՅՈՑ ՀԱՆՐԱՊԵՏՈՒԹԻՒՆԸ

Աղօթք Վերառաքեց Առաջնորդ Սրբազան Հայրը

Հայաստանի Հանրապետութեան հռչակման 88-րդ տարեդարձին առթիւ, Կիրակի, 28 Մայիս 2006-ին, Արեւմտեան Թեմի մեր բոլոր եկեղեցիներէն ներս յընթացս Ս. Եւ անմահ Պատարագի տեղի ունեցաւ Հանրապետական մաղթանք:

Կլէնտլի Ս. Աստուածածին եկեղեցւոյ մէջ, նախագահութեամբ Եւ հանդիսապետութեամբ Թեմիս բարեխնամ Առաջնորդ՝ Բարձր. Տ. Մուշեղ Ս. Արք. Մարտիրոսեանի, Եւ մասնակցութեամբ եկեղեցական հայրերու, հանդիսաւորապէս նշուեցաւ Հայաստանի անկախութեան տարեդարձը, կատարուեցաւ Հանրապետական Մաղթանք Եւ Եռագոյն դրօշակի օրհնութեան սրտառուչ արարողութիւն:

«Նշանաւ ամենայաղթ Խաչիւղ քո Քրիստոս» շարականին երգեցողութեամբ, Եւ ընկերակցութեամբ ՀԱՄԻ-ի արի-արեւունշներու, Եւ առաջնորդութեամբ Ս. Խաչին՝ Հայաստանի Հանրապետութեան Եռագոյն դրօշակը թափօրով վերամբարձ եկեղեցի բերուեցաւ Եւ կանգնեցաւ Դասին մէջ: Կանոնական աղօթքներէ Եւ գոհաբանական յատուկ բարեմաղթութիւններէ ետք, հանդերձ եկեղեցական դասին՝ Առաջնորդ Սրբազանը օրհնեց Եռագոյն դրօշակը, Հայաստանի Հանրապետութիւնը, պետական պատասխանատու այրերը, հրամանատարները, հայոց զօրքը Եւ հայ ժողովուրդը: Երկարէ ձեռքդ ո՛վ Տեր, ըսաւ Սրբազանը, Եւ օրհնէ ամբողջ հայ ժողովուրդը, մեր ազգը Եւ հայաստանեայց եկեղեցին:

Իր հոգեւոր պատգամին մէջ, Առաջնորդ Սրբազանը յիշեցուց որ Համբարձման յաջորդող Յինունքի այս վեցերորդ Կիրակին կը կոչուի Երկրորդ Ծաղկազարդ Եւ յիշատակութիւնն է Քրիստոսի երկինք մտնելուն, Հօր Աջ կողմը բազմելուն Եւ իշխանութիւն առնելուն: Այս Կիրակին նաեւ մեր եկեղեցւոյ կողմէ կոչուած է *Մեծահրաշի Կիրակի*, որովհետեւ օրուան Օրհնութեան շարականը «Մեծահրաշ այս խորհուրդ» բառերով կը սկսի, Եւ կը նկարագրուի Ս. Գրիգոր Լուսաւորիչի վիրապի կեանքէն դրուագ մը, ըստ որուն՝ երբ Գրիգոր Լուսաւորիչ խոր վիրապին մէջ էր, երկնային այցելութեամբ կը սփոփուէր չորրորդ դասի հրեշտակի մը կողմէ, որ ամէն օր սուրբին կ'այցելէր: Օր մը հրեշտակը կը բացակայի: Յաջորդ օրը երբ Գրիգոր Լուսաւորիչ բացակայութեան պատճառը կը հարցնէ, հրեշտակը կը պատմէ թէ Քրիստոսի Համբարձման առթիւ երկինքի մէջ փառաւոր ընդունելութիւններ Եւ տօնախմբութիւններ տեղի ունեցած են Եւ ինք իր դասուն հետ մասնակցած էր տօնախմբութեանց Եւ չէր կրցած իրեն այցի գալ: Այնպէս՝ ինչպէս մահուան վրայ Աստուածորդի Քրիստոսի տարած յարութեան յաղթանակը Եւ երկինք համբառնալը

Անոր աստուածային փառքին գրաւականներն էին, նոյնպէս ալ հայ ժողովուրդի վեց հարիւր տարիներու գերութեան եւ մահուան ճիրաններուն մէջ տուայտանքներուն յաջորդող Սարդարապատի, Բաշ Ապարանի եւ Ղարաքիլիսայի հերոսական ճակատամարտներով ձեռք բերուած հայրենի անկախութիւնը՝ մեր ժողովուրդի անսկուն հաւատքին, հաւաքական պայքարին եւ ազատօրէն ապրելու կամքին գրաւականը եղաւ: Յարութեանական այդ ոգին անմար մնաց նոյնիսկ անաստուածութեան եւ համայնավար կարգերու եօթանասուն տարիներուն, մինչեւ արդի Հայաստանի ու Արցախի ազատագրումը համայնավար եւ ազերի անօրէն լուծերէն:

Ապա Սրբազան Հայրը առ Աստուած գոհութիւն եւ փառք վերառաքելով՝ մաղթեց որ Տէր Աստուած անսասան պահէ վերականգնած Հայաստանի հանրապետութիւնը, աւելցնէ շնորհն ու իմաստութիւնը բոլոր անոնց՝ որոնք հայոց պետութեան իշխանութիւնը կը պահեն, որպէսզի արդարութեամբ եւ ուղղամտութեամբ առաջնորդեն, ծառայելով ժողովուրդին: Թող Տէր Աստուած մեր հրամանատարներուն եւ զօրքին քաջութեան ոգին աւելցնէ ու զօրացնէ, օրինէ՛ ու պաշտպանէ ամբողջ հայ ժողովուրդը, հայ ազգը եւ Հայաստանեայց Առաքելական Ս. Եկեղեցին ի Հայաստան, յԱրցախ եւ ի սփիւռս աշխարհի:

Պատարագի աւարտին, հոգեհանգստեան պաշտօն կատարուեցաւ Սարդարապատի, Բաշ Ապարանի եւ Ղարաքիլիսայի, ինչպէս նաեւ Արցախի եւ նոր օրերու նահատակ բոլոր ազատամարտիկներու հոգւոց խաղաղութեան համար:

Մ.Ծ.Վ.Ա.

SPECIAL PRAYER FOR THE REPUBLIC OF ARMENIA

LORD, KEEP THE REPUBLIC OF ARMENIA
SECURE AND STABLE

Prayed the Prelate

On Sunday, May 28, 2006, special prayers took place at all Western Prelacy Churches in celebration of the 88th anniversary of the independence of the Republic of Armenia.

At Glendale's St. Mary's Church, His Eminence Archbishop Moushegh Mardirossian, Prelate, accompanied by Very Rev. Fr. Muron Aznikian and St. Mary's Pastors, offered special prayers and officiated over the blessing of the Armenian flag.

Guided by the Holy Cross and accompanied by hymns, the flag was brought into the church by H.M.E.M. scouts, where the Prelate blessed it and offered blessings for the Republic of Armenia, and the Armenian people. The Prelate prayed, "Extend your hand, Oh Lord, and bless the Armenian people, our nation, and the Armenian Apostolic Church."

In his sermon, the Prelate reminded the faithful that this first Sunday after Ascension and the sixth Sunday of Eastertide is called Second Palm Sunday, and symbolizes the entering of Jesus into heaven and inheriting the heavenly kingdom. Thus, he prayed to the Almighty Lord to keep the reestablished Republic of Armenia

secure and stable, and to grant wisdom to the leaders of our republic so that they may serve our people with honesty and integrity. May the Lord enhance and strengthen the courageous spirit of our commanders and troops that defend our nation, and bless and protect our people, nation, church, Artsakh, and the Diaspora.

Following Holy Mass, requiem service was conducted for all the martyrs of our nation and people.